

Kekwa tepiian tanjung

Sayang Sakinah
(Bahagian 2)

Aku meloloskan diri setelah sampai di stesen KTM Serdang. Lama juga perjalanan dari KL Sentral. Begitu juga Jilah. Kami sama-sama menghayun langkah menuju ke perhentian bas. Terasa hatiku ingin segera sampai di kolej kediaman. Pening kepalaku melihat gelagat rakan-rakan sebaya.

Memedihkan mata yang memandang. Melukakan hati yang tenang. Tuhan, tunjukkanlah kepada mereka hidayah dari Engkau! Terangilah mereka dengan cahaya kesedaran. Tidak inginku lihat mereka menuju ke alam kemusnahan. Aku tahu Engkau menyayangi kaum Sakinah. Ya, aku yakin dengan iman.

Simbahan cahaya sang mentari terasa menggigit-gigit rona kulitku. Bahang yang terpancar ke permukaan bumi amat terasa. Titisan keringat mula terlukis di wajah. Meskipun aku penat, namun pancainderaku masih aktif. Sengaja aku biarkan mata merayap ke kawasan sekeliling. Sengaja aku relakan bebola penglihatan menerokai sekitar kawasan Serdang. Dengan sebuah motif tersemat di dalam nurani. Menelaah perlakuan insan sebayaku. Memerhati gelagat anak watan masa kini.

Sungguh memilukan. Sayu hatiku melihat senario yang menimpa. Bukan aku memandai-mandai ingin menghakimi mereka. Tidak juga aku berniat menilai gerak-geri mereka. Tak terasa aku bermaksud, nak mengada-ngada ingin memberi sebuah penilaian. Cuma aku simpati, menyayangi kaum-kaum Sakinah sama seperti ahli keluargaku. Cubit paha kanan, paha kiri pasti terasa jua.

Kewujudan tiga anak gadis mencuit hatiku. Penuntut di Universiti Putra Malaysia, aku kira. Kad matrik yang digantung pada leher membuatku mengecam siapa mereka. Pakaian yang mereka sarungkan menyebabkan aku menggelengkan kepala. Paras rupa punyalah lawa. Tapi, pakaian yang dipakainya memedihkan mata yang memandang. Serasi sangat dengan gelaran wanita moden kini.

Blaus bagai tidak cukup kain, menampilkan khazanah miliknya. Begitu juga skirt, pendek. Patutlah sego-longan jejak rakus tak henti-henti meneliti kehadiran mereka. Tak hairanlah bila berlambak-lambak kes yang membabitkan seksualiti berlaku. Kes rogol, buang bayi, pemerdagangan orang, pelacuran dan lain-lain. Inilah penyumbangannya. Ya Tuhan, ke manalah belia Sakinah menghilang? Kembalisanlah mereka. Aku begitu menyayangi mereka sebagai seorang sahabat dunia dan akhirat. Ya, aku sayang pada mereka!

Aku cuba melabuhkan punggung di bawah pondok menunggu bas. Lagi, mindaku menerawang jauh sambil memikirkan pantun. Pantun, pantun dan pantun! Itulah yang aku ingat seharian, dalam rutin kembara kehidupan ini.

Terasa harus aku lenturkan pantun itu berhampiran dengan mereka. Bukan mengejek, cuma ingin menyedarkan. Berharap mereka menyedari cara mereka berpakaian. Moga-moga mereka tak tenggelam dek arus ke-

gelapan, keinginan nafsu. Bahu Jilah, ku cuit.

"Jilah, aku nak jual pantun ni! Boleh tak kalau kau beli?" ku lemparkan secara sengaja.

Jilah memandangkanku. Ku berinya waktu untuk berfikir.

"Hmm, boleh kot! Salah rima jangan marah tau!"

"Okey. Pantun aku jual harap dibeli. Dengar-dengarkan wahai adinda," siap aku bertutur sambil disaluti bahasa kiasan. Seolah-olah menyertai pertandingan pesta pantun.

*Layu kekwa tepian tanjung,
Dipetik garuda dibawa ke laman;
Punyalah lawa pakaian disarung,
Menjolak mata tergodakah iman?*

Jilah tersenyum simpul mendengar aku berpantun. Lebar sekali senyuman dia lukis pada bibirnya. Ku balas semula dengan lirik mata. Ku tuju kepada gadis tiga sekawan, di tepi kiriku.

Lama Jilah mengorek idea untuk menjawab semula pantun. Penuh kesabaran aku menunggunya. Terkumat-kamit mulutnya. Yakin sekali aku bahawa Jilah mampu menjawabnya. Pernah dia membabitkan diri dalam dunia pantun. Meskipun tak lama.

Dia adalah rakan yang 'supporting' dalam segala hal. Selesai sepuluh minit, baru Jilah kelihatan cuba bersuara dengan jawapannya berbunyi begini:

*Jatuh hiasan ke bawah rumah,
Kaca nan tajam terguris peti;
Tergoda iman pastilah sudah,
Andai malam berbisnes tak henti.*

Senyuman aku ukir lagi pada bibir. Berpuas hati dengan jawapan yang Jilah beri. Ternyata mampu jua dia menyahut cabaran daripadaku. Ku lihat, tiga sekawan mewarnakan wajah yang masam. Riak rupa kusam terpantul di helaian muka. Apa mereka terasa dengan pantun kami berdua? Ahh, biarkanlah! Siapa yang suruh memakan cili kalau tak tertahan pedasnya? Haha.. bukan jahat, cuma berharap mereka menyedari kesilapan diri.

"Best-lah jawapan Jilah. Ada potensilah nil!" sambil berkata-kata, aku tersengih memandang Jilah.

*Berseri siantan di dalam pasu,
Hinggap tebuhan bunganya muram;
Diam bukan bermakna bisu,
Hati ini Tuhan yang faham.*

Panjang lebar senyumanku mendengar Jilah melafazkan pantunnya. Dengan penuh bergaya. Terima kasih Tuhan kerana Engkau menganugerahi aku dengan seorang rakan yang Sakinah. Dia Muslimah tapi cara perlakuannya juga menunjukkan dia seorang yang berkeyakinan dalam agamanya. Begitu jua aku. Meski aku beragama Kristian, aku tetap menjaga semua aspek kehidupanku. Pertuturan, cara pemakaian, gerak-geri, jua lain-lain aspek. Tak ingin maruahku sebagai orang yang beragama dicalar dek hinaan dan nafsu.

Doa selalu ku panjatkan kepada Maha Pencipta untuk memimpin kembali rakan-rakan seperjuangan yang menghilang dari jalan-Nya. Moga-moga mereka dipertemukan pangkal jalan. Terus-terang, aku menyayangi mereka. Mereka juga tulang belakang negara. Permata hati setiap insan

bergelar emak. Seperti aku, aku juga punya Sakinah kesayanganku sendiri. Tak lain tak bukan, ibu adalah permata hatiku. Namun dia berbeza dengan Sakinah-Sakinah lain. Dia bersinar, pemberiku harapan.

Sangat hatiku berharap agar Yang Maha Esa mendengar suaraku. Berimpian agar mereka diberi hidayah sebagai panduan kembali ke pangkal jalan. Sebagai pedoman kembali menuju ke pangkalan yang benar. Seperti mana yang Engkau kehendaki. Harapan yang berterusan ku semat gigih dalam naluri manusiaku.

Wajib aku berdoa jua untuk mereka yang seperti layang-layang terputus tali. Tiada tempat diharap pasti untuk melabuhkan punggung. Apatah lagi berbaring, menikmati betapa indahnya dunia. Dan betapa beruntungnya manusia dicipta serta dikurniakan akal dan pengetahuan. Minta juga agar Tuhan memberi mereka kesenangan di dunia akhirat. Meskipun di dunia yang fana ini, mereka terpaksa merasa titisan air keperitan. Berlauk kehinaan. Dengarkanlah doaku Ya Tuhan! Hanya itu kupinta pada-Mu.



Lister Robert
Anak Sayang
Pelajar
Kewartawana
Universiti Putra
Malaysia

ejaan
GEMILAKU